

APOIO ECOLOXISTA AO PLAN DE XESTIÓN DO LIXO DA MANCOMUNIDADE DO MORRAZO

REPRESENTANTES DA FEG, ADEGA E LUITA VERDE REALIZARON UNHA VISITA AO MORRAZO E PARTICIPARON NUNHA CHARLA ORGANIZADA POLO CONCELLO DE CANGAS.

A Federación Ecoloxista Galega (FEG, integrada por perto de 40 colectivos ecoloxistas de toda Galiza), a Asociación para a Defensa Ecolóxica de Galiza (ADEGA) e o colectivo Luita Verde do Morrazo manifestan o seu apoio ao plan de xestión do lixo aprobado pola Mancomunidade de Concellos do Morrazo, no que se incluen os concellos de Cangas, Bueu e Moaña. Os mesmos colectivos solicitan de Marín a sua incorporación ao proxecto de reciclaxe do Morrazo, así como o rexeitamento por parte do concello de Vilaboa da instalación no seu territorio da polémica planta empacadora de Guixar, de onde sería trasladada.

Con todo, o alcalde de Cangas confirmou que Marín rexeitara participar no plano e que os restantes tres concellos seguirán adiante co proxecto, que conta cunha subvención da Unión Europea. A mancomunidade ten de prazo até o mes de xullo para presentar o proxecto definitivo ao programa POMAL. Para entón deverá-se ter reapdatado o plano para os tres concellos (55.000 habitantes no canto duns 80.000 iniciais) e aprobado en pleno a sua adesión ao mesmo.

Os responsáveis municipais mostraron a sua confianza en que o proxecto de recollida selectiva e reciclaxe comezaría a andar a finais de ano.

Asimesmo, os concellos teñen previsto ou están realizando unha serie de melloras nos actuais vertedeiros, como solución provisional até a adopción do novo plano.



A PANTASMA DA TERMOLISE PERCORRE O PAÍS.

Diferentes empresas, algunas delas as mesmas que as de incineración, adiccanse ultimamente a visitar os concellos e ofrecer-lles a termolise como solución novedosa e ecolóxica para a xestión do lixo. Din que permite reciclar a totalidade do lixo e que non contamina nada. Vilagarcía, O Carballiño, ou A Coruña son algúns dos concellos que por un tempo (no caso de Vilagarcía xa se botaron atrás) acreditaron na solución máxica.

Unha vez mais confunde-se gato con lebre. Aportaremos aqui unha explicación mui breve do que é a termolise, ainda que quen queira mais informa-

ción poderá contactar con ADEGA. A termolise consiste nun proceso de tratamento térmico do lixo (ou doutro resíduo ou combustíbel) polo cal a masa de lixo se separa en duas partes, unha sólida a modo dun resíduo carbonoso, e outra gasosa. Ambas fases manteñen o poder calorífico, e o seu destino é a combustión posterior para aproveitar ese calor. Depois da termolise do lixo ven por tanto a combustión do gas e do resíduo sólido, tratando-se en realidade dunha simples separación en duas etapas do proceso de combustión, que na incineración se realiza nunha única etapa. A implantación e operación é ainda mais complexa que a dunha incineradora.

A valoración ambiental da termolise é por tanto mui similar á da incineración, xa que destrue os materiais que deverían ser recollidos e aproveitados mediante a reciclaxe, ao tempo que non evita a contaminación, que agora se xenerará non só na segunda etapa de combustión, senón mesmo no proceso de termolise. A eficacia de recuperación enerxética é reducida, e a tecnoloxía non está provada para utilizar de forma fiável un material tan heteroxéneo como é o lixo urbano.

Cabe lembrar que FENOSA tivo en funcionamento unha planta experimental de termolise para o aproveitamento de biomasa forestal, que acabou abandonando por falta de viabilidade. Por outro lado, sen dúvida hai incautos que se confian nas boas palabras de executivos foráneos, pero este non semella ser o caso do alcalde de A Coruña, onde non alcanzamos a ver na sua adesión á termolise outra causa que unha cortina de fume ou unha xustificación momentánea.

A JUNTA NOM TEM CONTENTORES DE RECOLHIDA SELECTIVA PARA OS CONCELLOS

Mais umha vez o Governo Galego vem de demostrar o seu nulo interese pola reciclaxe do lixo. Depois de anunciar a distribución de contenedores para a recollida selectiva, e de publicar esta convocatoria no DOGA para que os concellos solicitaram estes contenedores, encontramo-nos que a Consellaria de Política Territorial tem que reconhecer que as solicitudes desbordam as suas previsons, e mesmo que carece de contenedores para papel (um dos mais demandados) e para metal, só estando em condicóns de atender a demanda dos recipientes para recoller pilhas.

CONTENTORES

	Demandados	Disponíveis
PAPEL	2568	0
VIDRO	2672	148
METAL	1092	0
PLASTICOS	1274	138
PILHAS	1842	1817
GENERICOS	15545	2078